

# Cardientscha, scola, baselgia

Il cudisch da Cornelia Vinzens el museum local da Laax

■ (anr/abc) Il cudisch ha giu in grond resun e vegn discuss actualmeins el la publicitad. Tgi ch'entscheiva a leger metta strusch dalla vart el. Dumengia sera ha Gion Balzer Casanova da Laax confirmau quei ed era fatgs ord il cudisch da Cornelia Vinzens. Igl ei in ideal liug per exponer fotografias. L'autura ha exponiu tuts 17 portrets en differents loghens dil museum. Ina farscha vegn encunter denter begls, zeivers e rauba ch'ins duvrava per far lischiva. Igl ei il portret da Marionna Arquisch-Vinzens. Tiel calger entaup'ins Trudi Albin-Cathomas. Sia fotografia fa paretta sco sche la dunna da Trun sesess veramein leu denter terscheuls, il sez d'ina carrosscha e laischs dil calger. En in auter cantun cun vischala da lenn ves'ins Marcel Beer e sia dunna. Cornelia Vinzens ha exponiu la sonda e dumengia vargada tuts portrets da ses partenaris che han raquintau ad ella ord lur veta. Cun siii cudisch «Nus savevan da nuot auter – portret d'ina generaziun en Surselva» ha ella visitau il museum da Laax.

## «Il selvadi dil mund»

Dumengia suentermiezgi ha «Cultura el liug» organisau in discuors public cull'autura e cun Gion Balzer Casanova. Myriam Pelican-Camenisch haveva interrogau l'autura avon in onn als Gis da litteratura a Domat. Leu haveva Cornelia Vinzens annunziu ch'il cudisch seigi sin buna via, ei drovi denton in liung flad entochen ch'ei seigi aschi lunsch. Uss ei il product stampau cumpariu e la gliעד dat ils emprems commentaris. Ils biars ein affirmonts. «Gie, exact aschia eis ei stau», han ins udiu da biaras varts. Denter ils varga 70 presents



Trudi Albin-Cathomas, ina dallas persunas ord il cudisch ch'ei stada exponida la davosa fin d'jamna el museum da Laax.

che han tedlau las prelecziuns ed il discuors han plirs confirmau quei. Aschia era Gion Balzer Casanova. El ha tratg parallelas cun sia veta, sia giuventetgna a Sursaisa, culla mumma ch'ei morta baul, co il bab ha stuii dumignar la situaziun. Il cant e la musica hagien tenu ensem la famiglia. Gion Balzer ha raquintau ch'el cantavi gia da buobet terribel bugen. El cantavi suenter tut. Aschia cantava el per exempel tier la strofa dil «Clara notg» «il selvadi dil mund» nuncapend daco ch'els carschi

rievien e ch'el havessi duui cantar «il salvader dil mund». Igl ei ina da numerusas episodas che ha divertiu igl auditori duront il discuors cun Myriam Pelican. En in bloc ha Cornelia Vinzens prelegiu ord il cudisch, lu ha ei dau in discuors autentic cul hosp. En in auter bloc ei la scola stada in tema. Scola e famiglia fuvan duas caussas, ed in scolast vegneva observaus da tuttas varts tgei ch'el fageva, sch'el seigi fors partischonts, ch'el s'engaschi el vitg per uniuns e publicitad secaveva da sesez.

Per quei suentermiezgi el museum da Laax ha l'autura eligiu sapientiv ina persuna dil vitg ch'ei buca vegnida a plaid el cudisch e che sa raquintar e cumparegliar. Gion Balzer ha representau sia generaziun, quella ch'ei naschida cuort avon la Secunda Uiera mundiala e che seregorda aunc dallas notgs stgiras e dallas novitads el radio ord l'Europa nua che l'uiara furiava. Suenter il discuors han ils presents saviu discutir vinavon da reminiscenzas e regurdientschas da buns e meins buns temps.

## NUMNASONTGA E HALLOWEEN

Tgei era communabel – tgei oz auter?

(anr) Numnasontga ei ina gronda fiasta catolica che ha liug mintgamai ils 1 da november. Sco quei ch'il num «Tut ils sogns» (omnes sancti = numnasontga) di, stattan quels, resp. lur veneraziun el center. Quei di visetan ils catolics era las fossas da lur morts sin santeri ed orneschan quellus. Savens envidan ins leu era ina candeila. Quella sclarescha aunc il di sissu, il Di dallas olmas (2 da november).

Ils reformai seregordan da lur defuncts la dumengia dils morts, ni dalla perpetnada. Quella ha mintgamai liug la davosa dumengia avon igl advent.

La sera avon Numnasontga, pia dils 31 d'october sils 1 da november, senumna era «Hallows Eve». Cul temps ei quella noziun englesa sereudida sin Halloween. Oriundamein era Halloween fetg derasaus en l'Irlanda catolica. Entuorn la mesadad dil 19. tschentaner ei Halloween vegnius exportaus culs immigrants irlandes els Stadis Uni (USA). Els onns 90 dil tschentaner vargau ei quella isonza da Halloween vegnida «importada» anavos en l'Europa.

Quei Halloween ei ussa denton sesligiaus fetg dil senn e cuntegn oriund per Numnasontga ed ha survegniu era exteriuramein tut in'otra fuorma. Bein s'orneschan ils carstgauns la sera dils 31 d'october aunc cun motifs che regordan alla mort. Enstagl da seregurdar – sco oriundamein – dallas olmas, semuossan ins oz cun costums da mort en tuttas fuormas. Halloween ei pia sesecularisau ad in eveniment da spir rucida e surtut da e per tementar la gliעד cun bia canera e smanis.

## Scola da talents Surselva all'ILHGA

■ (cp) Dapi l'avertura dalla scola da talents seprenta ella all'ILHGA. Uonn ha ella attratg la gliעד cun ina concurrenza da batter Nino Schurter ni Sina Candrian. Tgi sa schonglar cun treis ballas e star sin ina aissa messa sin ina zuola? Ni tgi sa tener igl equiliber sin ina comba e far exerchezis d'equiliber e da forza e quei 10 gadas? Gl'ei stau da smarvigliar cons che han saviu batter Nino Schurter ni Sina Candrian. Tgisà sche quei tunschess gia per l'admissiun alla Scola da talents Surselva?

Ina raschun per la preschientscha alla ILHGA ei da far attenta la gliעד sin la purschida da scola unica per giuvenils fetg talentai en nossa regiun e d'informar la populaziun pli detagliu sur d'admissiun e finanziaziun dalla scola. Aschia ei si era vegniu fatg attents sin la sera d'in-

formaziun che ha liug ils 2-11-2016 allas 19.30 ell'aula a Glion. Leu vegn informau geniturs e scolars interessai sur dil modus d'admissiun, sur dalla purschida pedagogica ed era sur dall'instrucziun polisportiva e musicala.

Al stan dall'ILHGA ein sper scolasts ed il coordinatur dalla scola da talents era il suprastonts dalla uniun da fautors dalla Scola da talents Surselva stai presents per dar sclariment. L'uniun da fautors sustegn projects e purschidas accessorias cun encurir fautors e sponsurs. Cun quella purschida sa la scola augmentar la qualitat per ils giuvenils talents en sport ni musica. Aschia vegnan per exempel moduls per musicists sco performance, teater, scolaziun dalla vusch susteni cun daners sponsurai da fatschentans ni organizziuns publicas.

La concurrenza da batter in dils stars sco Schurter ni Candrian han suandon-tas persunas gudignau:

1. Schöller Andrin, Via Falera 3, 7031 Laax: In bon da Menzli Sport en la valeta da 100 francs  
Sponsur: Uniun da fautors Scola da talents Surselva.
2. Projer Michela, Quadras 244A, 7144 Vella: Duas entradas per la dernière da Rolf Schmidt XXL  
Sponsur: la fermata – cultura falera
3. Wellinger Livio, Via Casti 1, 7151 Schluein: In bon dil Hotel Eden Glion en la valeta da 50 francs.  
Sponsur: Hotel Eden  
Premi special per separticipar: in bon da 50 francs da Maggi: Carello Chiara, Perpionas 117, 7156 Rueun



La scola da talents ei seprentada cun in agen stan all'ILHGA a Glion.

## MOUNTAINBIKE

### Nominaus pil Swiss Cycling Award 2016

(anr/gv) Il mountainbiker Vital Albin da Tersnaus ei vicecampiun mundial dils juniors. Dapi onns eis el adina alla testa en sia categoria da vegliadetgna. Empau pli grev vegni la stagiun proxima sco commember dalla categoria U23. Per la proxima sfida drova il sportist excepziun igl agid da ses amigts – e da tut ils Sursilvans. El ei numnadamein nominaus pil Swiss Cycling Award 2016 ella categoria «generaziun giuvna». En quella categoria ha il Lumnezian ina dira lutga cun plirs giuvenils che han gudignau uonn aur als campiunadis mundials da lur categoria. Sustener Vital Albin san ins cun votar per el. Quei san ins far silla pagina d'internet [www.swiss-cycling.ch](http://www.swiss-cycling.ch) e leu vinavon sin «swiss cycling awards 2016».

## DECANAT SURSELVA

### Dieta davart lèt e famiglia a Glion

(anr) La Grupa regiunala Surselva – ina secziun dil Cussegl pastoral grischun –organisescha ils 19 da november 2016 ina dieta per meditar e s'entupar. Quella ha liug ella casa pervenda dalla pleiv catolica da Glion. El center stat – en connex cun igl Onn sogn dalla misericordia – il document postsinodal da papa Francesc davart «La legria dalla carezia (amoris laetitia)». La posiziun, prida dil papa – suenter la sinoda dils uestgs a Roma – muossa co equilibrar denter ideal e realitad pertuccont la carezia humana e la famiglia. Ella ei in agid pastoral en favur da lèt e famiglia. Sur Marcus Flury, menader dalla grupa sursilvana, vegn ad introducir. Sur canoni Joseph Bonnemain, parsura (Official) dalla dertgra digl uestgiu da Cuera, presenta, declara, analysescha e commentescha il document papal davart «Lèt e famiglia». En special cuntegn il capitel 6 perspectivias per la pastora-ziun da lèt e famiglia.

Envidai a quella dieta ein tuts quels, als quals lèt e famiglia stattan a cor.

## RESUN

### In deletg da leger La Quotidiana

Cun ardiment leg'ins igl artechel: «Parc naziun-Adula – il bastiment sfundra» da scolast secundar e poet e scribent Leo Tuor-Kurtb. In magi (Magier) dil lungatg, gnanc tgisà. Gie, tgei che ha il lungatg ei il retg, ha la plemma ch'ei il sceptor. Aunc en 300 onns savein nus leger dil far e demanar e dalla missiun dil scribent e poet. Respect che la vischnaunca da Sumvitg ha tals tgaus. Interessanta ei era ina columna dad ier da Clau Dermont, siu tat Rest Plasch Dermon-Mirer, in vegl amigt da mei, era fetg prominents, in um da peisa, scolast a Rueun, um cun tgaus e cor. La Quotidiana dils 25-10-2016 vala la peina da leger e da meditar ils texts e maletgs. Ils carstgauns che ein pro il Parc Adula han l'economia el tgaus e quei ei buca nuot. Con havein nus dalla Cadi selamentau dalla digren da plazs da lavur. Medel ha survegniu in tgamun plein forza e vigur – secapescha che votantas e votants han il comando suprem e buc il president. Per quei, votantas e votants, examinei cun saung freid e decidi cun perschasiun.

Giusep Librat Bundi, Flem

### «Il pur suveran» en nova versiun musicala

Sche miu antenat Gion Antoni Huonder sto schon star neu cun siu «Pur Suveran» per las polemicas Pro e Contra Parc Adula, lu sil-meins aunc igl avis silla versiun musicala moderna da sia poesia. La canzun rockiga «Libertad». Track 1 sin il secund DC digl album dubel che la grupa Galiots ha ediu avon in onn.

Mirei sut Galiots.ch

Flavio Huonder, Domat